

ASO FARAILE, 29 IANUARI 2021

Na nofoia e le Fofoga Fetalai le Nofoa i le itula e 9:13 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofa Faitulafono i lena taeao.

TUUNA ATU O PEPA

Na tolaulauina e le Failautusi i le Fono Aoaofa le faasologa o Pepa e tusa ai ma T.T.49(2).

1. P.P.2020/2021 Nu.128, Lipoti Faaletausaga a le Faalapotopotoga o Vaa a Samoa 2020.

TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga faaauau i luga o le faitauga faalua – Aso 8

FOFOGA FETALAI: E tolopo Galuega a le Fono Aoaofa Faitulafono i le aso ananafi, ua maea ona saunoa le sui usufono mo le itumalo faaalaalafaga o Vaisigano Nu.2. Ma ua avanoa foi lumamea nei o le Palemene mo se isi sui usufono e tulai mai e saunoa e tusa ai o le tatou Galuega mo le Tala Faatatau Faaopopo (Nu.1) o le Tupe 2020/2021.

Ia, tulai maia se sui usufono e lelei ona tamua i lena taeao. Ia, oi, faapea e tulai mai o le sui usuofono... Ia, tulai maia lau Afioga i le Taitai o le Malo, lau Afioga i le Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ua ou matau ua faatutugata le Maota i le taeao nei ai o le tau e faale-lelei foi i le aso ananafi ma le taeao nei. Ae ua ou tulai atu e fofoga aloaia le Maota, e le o toe umi ona amata lea o le Fonotaga e faaalu i fesootaiga televavave a Taitai o le Atu Polenisia o le Pasefika. O le Faalapotopotoga lena po o se tasi o

Faalapotopotoga i totonu o saofaiga a Taitai o Malo o le Pasefika, e faapitoa i le faamalasia o atinae aemaise le tulaga o le soifua o tagata Polenisia ma a latou tu ma a latou agaifanua sa masani ai i le afe ma afe o tausaga talu ai, lea e i totonu o le lio o le triangle e tosi mai lava i luga i Hawaii e tau i Maori po o Aotearoa i le itu i Saute o le Pasefika, i le itu i Sasae i le atunuu lea o Eseta, ma toe agai ai i luga i Hawaii. O totonu o le tafatolu lea, o lo o aumau ai tagata o lo o faalupe nei o tagata Polenisia. Ua leva ona matauina pea i totonu o le lio o Malo o Taitai o le fonu a Taitai o le Pasefika le faatulagaga o ia foi vaega o le Fono, o i latou o Maikoronesia, o i latou o Melanisia. Lea la ua faatu le Faalapototoga lea sa tatou uunaia malosi ma faatu aloaia ai i Samoa nei i le 2011, ua 10 nei tausaga talu ona faatuina. Ma o tatou na uluai avea ma Taitaifono, ma o lo o faagasolo le faasologa. O lea la ua Taitaifono nei le Kovana o Amerika Samoa, na ia valaauina ai le Fono lea ina ia usu i le taeao nei se i tagofia mataupu ogaoga ia ua i ai se tulaga o lo o vesia ai le Pasefika, ona o tofiga i le Faauluuluga o le Faalapotopotoga o le Forum. O lea la e talo i le taeao nei ae faaoga i ai fesootaiga televavave.

Ua ala ona ou taua lea mea lau Afioga, ua toetiiti ona ou toesea lea ou te auai ae ou te popole lava i te i ua ou toesea ae tu ae foi Olo faapea mai, o lea foi ua leai Tuilaepa. Ia, e pei la o le mafuaaga lena ua ou vave tu atu ai i si laolao lea ua tau filimafua le taeao i le tofa maualuga, tofa paia i sui usufono o le tatou Maota nei, po o ai foi o le a tulai e osi le tatou taulaga faafetai i le Attua i lenei taeao ona o lana pule faasoifua ua taitaiina mai ai Taitai o le atunuu i le tatou Fonousu, Fonotoa i lenei taeao, Fonopaia, tatou te soalaupule ai mataupu faaiu o le tatou Nofoaiga.

Lau Afioga i le Fofoga Fetalai, o si au agiagi lea ua ou tulai atu ai e momoli atu lau faamalo i sui usufono o le a tutulai mai, o le aso lenei e puupuu. Ua leva ona ou fia tulai atu e faamuta a tatou felafolafoaiga, ae agai loa i le tulaga o le auiliiliina o le tatou Tala o le Tupe. A o lea lava ou te vaavaai atu, i tuuaia foi au ou te pulepuletutu, ae o le agaga lena ia te au ma le Kapeneta, ia lava pea le avanoa e aumai ai mataupu taua a sui usufono o le tatou Maota nei, o nai a outou toe tā ia ae tatou te le i alo atu i le faiga filifiliga a le atunuu. Ia manuia tele lenei taeao.

FOFOGA FETALAI: Malo faafetai. Ia, se i...

Tofa Olo Fiti Afoa Vaai (Salega Sasae): Lau Afioga i le Fofoga Fetalai, mo sina avanoa.

FOFOGA FETALAI: Ia, se i tulai mai lava Olo.

Tofa Olo Fiti Afoa Vaai: Faafetai i lenei taeao fou ua taitai mai foi lou soifua ma so matou ola aua foi le faaauuina o le tatou galuega. Ae taua tele le tulaga lea ua saunoa i ai le Afioga i le Palemia ona o Fonotaga, ia afio lana

Afioga ae tuu mai le tatou Fonotaga, o lea o le a ou tago e faamaumau po o ai tagata ia e le o i ai. Toeitiiti lava toa-10 sui usufono o le HRPP e le o Fono i le taimi lenei, ae o le avanoa atu lava o matou nofoa, ia faalogo mai ua tuai, ua a, ua a. Ae manuia lau fonotaga pe a e afio atu, maua sou finagalo i le faamoemoe.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ua ou tulai atu foi e talia lelei le faamanuia faataga a le sui usufono. Ia, ae leai se mea e te tau popole ai, a mea ia o tioata lea e i luga i i, lea e pue lelei ai tatou sui usufono o lea e Fono a o la e fai a latou taaloga i telefoni.

FOFOGA FETALAI: Malo faafetai. Ia se i tulai maia se isi sui usufono e saunoa. E pei o sui usufono pei o Aleipata Itupa i... pei o lea e tau matau atu pe sao ea lau vaai, po o le sesega ea o lata vaai lea e pei... Ia, leaga o le aso puupuu le aso lenei. E tatau ona... ioe, e faapena. E le lelei foi lea mea o le faafofoga mai o le atunuu... Ia se i...

Tofa Olo Fiti Afoa Vaai: Lau Afioga i le Fofoga Fetalai, ia o lea ua tapena le Taitaifono o le Komiti o Tupe, ia ona tatou faauma ai lea.

FOFOGA FETALAI: Ae manaia foi le saunoaga a Olo e fesoasoani mai i le Nofoa.

Se i tulai mai lava sui usufono e fia saunoa e fua i ai le tatou galuega? Se i faamolemole e lelei lava ona tulai mai sui usufono e fia saunoa se i fua i ai le tatou galuega ona tapa loa lea o le Taitaifono o le Komiti o Tupe po o le Sui Taitaifono ina ia faapena ona fua i ai le tatou galuega. O ni sui usufono o fia saunoa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ae a pe a ou toe fautuaina lau fesili pe mafai lava ona faatulai faapea, o ai e fia saunoa i le taeao lenei. Aua o lau vaai atu, o le tele lava o sui usufono ia pei ua faatuatuai mai, e tai pei la o Faasootauloa lea faatoa taunuu, ia o sui usufono lava ua uma ona sausaunoa. E pei o le tulaga lena o le faafesili atu.

FOFOGA FETALAI: Lau Afioga o le agaga tonu lena o le fesili, o sui e fia saunoa i le aso, ioe. E pei o le tulaga lena e fua i ai le tatou galuega i lenei aso, aua afai e leai, e faigofie lava ona tatou toe tolopo ia mo lea vaiaso. E pei e faapena, o lea foi e tele fonotaga a le Palemia, a o tatou foi e tofu ma tiute o le Kapeneta ia.

Ia se i tulai mai le sui usufono mo Falealili Sasae.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, ia na o se manatu e faatupu lagona i lou finagalo.

FOFOGA FETALAI: Ua maea lau saunoaga, e le mafai ona alu lau faalua...

Afioga Fuimaono Teo Samuelu Teo: Oi ia, na pau la le mea lea na tau avatu ai se lagona pe...

FOFOGA FETALAI: Se i fesoasoani mai le sui usufono mo Falealili Sasae.

Afioga Fuimaono Teo Samuelu Teo: Faafetai.

FOFOGA FETALAI: E faale o maua atu le saunoaga a le sui usufono mo Falealili Sasae lau Afioga Fuimaono.

Se i saunoa mai le sui usufono mo le Nuu Tu Taulaga i Sisifo.

Afioga Faumuina Asi Pauli Wayne Fong (Nuu Tu Taulaga i Sisifo): Lau Afioga i le Fofoga Fetalai, e faalogologo atu foi ma le totoa i le tulaga o lenei taeao o lo o i ai tuatuaia o le Afioga i le Palemia, o lo o foliga gasegase foi. Ae faatu atu se lafo, *Tatou malolo ia i lenei aso se i aulia le Aso Gafua a sau nei.*

Ma le faaaloalo lava faafetai.

FOFOGA FETALAI: Ia, se i tulai mai le Minisita mo Galuega.

Susuga Hon Papaliitele Niko Lee Hang (Minisita mo Galuega, Felauaiga ma Atinae Esee): Lau Afioga i le Fofoga Fetalai, faafetai mo le avanoa. E matau atu ua le fia saunoa ni sui usufono i le aso Faraile, masalo ua tapena mai mo le Aso Gafua. E faatu atu se lafo lau Afioga e tolopo nei loa le tatou Fonotaga seia aulia le Aso Gafua, ma lou faaaloalo lava.

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, ou te tulai atu lava ma le ava tele, talu ai o lea lava e pei e foliga mai i le matou itu e noanoatia lava lauulu o Taemanutavae i saunoaga faa-sui usufono ona o tulaga faa-Minisita. Ae pe le o le matou avanoa lenei matou te lauga ai faa-sui usufono o la e foi e faafogafoga mai nai o matou itumalo e fia fai se faafetai pe a maua se... i lau faatagaga lau Afioga.

FOFOGA FETALAI: Ia, e manaia tele le finagalo o le Minisita o Aoga, ae ou te musu e tupu se mea fou i le tatou Palemene. E pei o nai tulaga na,

ma le isi mea, e le faapea o le a tatou usu mai tatou te Fono ona maua ai lea o tatou totogi. A le oo se tatou Fono e leai se totogi o se isi e maua. Aua ne i galo ia outou lena mea. Ioe. O le mea la lea, ia, tulai mai loa se sui usufono...

Se i tulai mai le sui usufono mo Sagaga le Usoga.

Susuga Hon Seiuli Ueligitone Seiuli (Sagaga le Usoga): Ua uma ona fai lau lauga lau Afioga i le Fofoga Fetalai ae ou te faatu atu ai le lafo, *Ae a pe a matou tuumuli matou ia ua uma ona fai a matou lauga atonu e faigofie ai ona tutulai mai ē e le i faia ni latou lauga ae matou tuumuli matou faamolemole lau Afioga i le Fofoga Fetalai.*

Ma lou faaaloalo lava lau Afioga.

FOFOGA FETALAI: Se e ese le manaia o finagalo faaalua i lenei taeao. Ioe. O la e maua uma lava i le TV le mea o... o sui usufono ia o le a nonofo o sui usufono e le i saunoa. Oi lea la o le a tulai mai le sui usufono mo Falelatai ma Samatau.

Ia, tulai maia le sui usufono e saunoa, lau Afioga i le sui usufono.

Afioga TAEFU LEMI (Falelatai ma Samatau): E tumu lava i le ava ma le matau i lenei taeao ua faatutugata le Maota, a ua faasolo le tatou galuega. O le mea la lea, leai, e le nofonofo foi lenei itumalo a o tau saili se isi e tamua i lenei taeao. O le mea la lea, faafetai ua maua le avanoa.

Ia, e momoli le faafetai i lenei taeao, taeao sa lupe, o lea ua tatou feiloai i pue o manu ae le o mala. Ua malo afua ailao ua maua i lo outou soifua laulelei i le taitaiga ma le agalelei o le Atua. Le paia aua o lele ua fafesagai segaula, o lupe lava sa vaoseese, a lea ua fuifui faatasi. Ona manatu lea, ua mapue ai le tiasa, aua ua lupepe le taumanuula, ua tulia tia o alii pei o le tala i le Malietoa. Ae a le tala ia Po ma Ao ma lo la fale na tulutulu i tao? E pei o le fale nai Amoa e lau i ula ae pou i toa. Lea ua afifio ai ma papaaao le paia ma le mamalu o Samoa.

Ia, ua taufai sunui ai nei ao o le lagi aua ua tala mai le lagi le mamalu o le Atua, ua faaalua i le vanimonimo galuega a ona aao. Ua taumailelei le igoaipu a Leuluaiailii, fetaiaimauso le igoaipu a Tauiliili, lalago faatasi le igoaipu a Sa Tupua, ta fesilafai le laau a le Tamaitai. Ona faapea lea o le tala a le Tauaana, ia, o le a see i le tai le faamoemoe o lenei itumalo aua o lele ua laulausasaa faiva o le fuamanusina i le paia o lenei Palemene sa tofuina le tai loloto, i latou na muai seua le lupemua o le taeao i taeao ua sola o lenei Fonotaga a le tatou Palemene. Sa outou sasaa faaoti ai le utu a le faimeaa, matou tapuaia outou faiva. Ona faapea lea, ua se togi a le seu na lagatila, faapulou i le tualima, faamalo le fai o le faiva. Sa outou seu lava i Falemua ae matou seu i Falevaai e tapuaia outou faiva, e faigata le tapuaiga a itumalo, ae a le faafofogaaga a Samoa.

Ia, o le tatou faasolosologa sue, ua ta iloa lava e si ou sue le taimi e oso ai i le faasologa. Ia, ua oo mai le faasologa ua tau faaiuiu foi saunoaga a le Maota, ona manatu lea, ia, matamata nonofo ia e pei o le tala i le Maota o le Tuiaana Tuimalealiifano, mapu ane i le vaiavea e pei o le fetalaiga i le vaimoto ma le fetalaiga i le lauti na leputea. Mapu ane i Niafane ma lafo le taula i Malolo, ae se i sii i le tai le sa o le Aiga Tauaana, e faigata le tapuaiga a si ou itumalo o Falelatai ma Samatau.

Ou te faatalofa atu i le afio o Lana Afioga Mamalu i Le Ao Mamalu o le Malo o Samoa lau Afioga i le Tuiaana Tuimalealiifano Vaaletoa Sualauvi II ma lau Masiofo ia Faamausili.

Le susu o le Sui o le Fono Sui Tofia lau Afioga i le Suafa lau Afioga Le Mamea Ropati ma le Faletua.

Foi mai i Maota, e faatalofa atu i lau Afioga i le Fofoga Fetalai, le Sui Fofoga Fetalai ma le 50 o sui usufono o le Palemene o Samoa.

E faatalofa atu i le paia o le Faigamalo, lau Afioga i le Taitai o le Malo lau Afioga i le Palemia ma le sa see 13 o le Aiga Kapeneta. E faatalofa atu i le afifio ma le papaaao ai o Minisita Lagologo e 13 o le Faigamalo a Samoa. O paia lava ia o le Faigamalo o lo o tu nei i le foe aua le sa o Samoa i leinei Paeaiga.

E faatalofa atu i lau Afioga i le Faamasino Sili, le Peresetene ma le paia o lena ituvai o le Faamasinoga.

E faatalofa i taitai o Ekalesia i so o se fatafaitaulaga, le ituaiga sa ma le aufaigaluega tofofi a le Atua ma la outou fatuaiga tausii i le atinaeina o le faaleagaga o o tatou tagata.

E faatalofa i Ofisa Sili o Pulega o Matagaluega ma Faalapotopotoga a le tatou Malo. Lau Susuga i le Failautusi ma le Sui Failautusi ma le Ofisa o le Fono.

Ia, e faatalofa foi i le tapuaiga a Samoa ua potopoto, ae a foi le tapuaiga a Samoa i la outou fita faafogafoga o le paia aua Aiga ma Tama, o Tama foi ma Aiga, le usoga a Tumua ma Pule, Ituaia ma Alataua, Aiga i le Tai ma le Vaa o Fonoti.

Ou te faatulou i le Maota, se i ou faatalofa i si ou tina la e i le fale ua 90+ ona tausaga, le tina ia Pelenatete Lafotanoa Taefu, ua sailiili matagi mai i Apia nei, ia maua foi se ea fou ma se faafouga fou. Ua vaai mai ua tui laei ma sau i le Fono a le Palemene, fai i tamaiti e ki le leitio, fai atu tamaiti, lau leitio la e i tua. Ia ki loa le TV fai mai, oka se aulelei o le Palemene o Samoa. Ia tina, lau le losalio ma tapuai, taua i le maua se ta palota i le ta itumalo.

Ia, ua fou lou vaa o le a folau lau Afioga i le Fofoga Fetalai, ua sausaufialele le manu nai Utufiu, paga lea, e le mafai lava ona alo loa lou vaa, e faigata o Latai ma Seela o le uso. Ua afea ai le Maota i Tiafau nei e le valaau paia a le Atua, a o le malae o le faautugatagi a Samoa. Le tama sa faamemelo i ai le Taulagi, le lupe sa faalele a Sa Tuala. Ua a nei? Lea ua solo le fue, ua gausia le tootoo o Mauga, a o se tagata ina a malosii, leo malosii a o tatou

mafuta. E le o se tagata e matua, masalo e tele lava ina o tatou matutua ai i le uso. Ae ua manatua le faamafanafana a le isi faifeau sa tautala ai i le gagana faa-Peretania ma faapea, “It is not how many years you live, but how you live those years, that is more important.” E le o le fia o le matua, a o le soifua na soifua ai. A lea ua oo lava i faatumutumuga lava o tofiga, ulufale mai i le Maota o le Palemene o Samoa. O tofiga lava e gata ai tofiga o le tatou atunuu. Mafuta ua mafanafana a ua valavala e aunoa ma se tala. O se uso ma te tuaoi i tua i nai o ma itumalo. Uma lana lauga i le isi aso faapea mai, “Taefu ua e vaai i ai, e le tuumamaina e si ou uso le ta auala lea ta te tuaoi ai i tua.” Na tatou o uma lava i le umusaga o le auala lea o si uso, alu ai lauga a le tootoo o le afioaga, ae oo ai ina sau ma le faaupuga, o le mea e lelei i Falelatai, e lelei foi i Faleaseela. Ou fai atu, “Uso, fai ia Talo e moni lava e uso Seela ma Latai, a o le sao o le tala a Tofilau na fai, o le mea e lelei i Apia e lelei foi i Salafai. Amanai fua nai atinae a si nei itumalo ua leva ona fuafua? Ua alu la si ou uso, ae i ai lana feau lea ua tuu mai mo i tatou. O le a le feau? Fai mai, tautuana lo outou soifua maloloina. O lana feau lena ua ou iloa o lea ua tuu mai mo i tatou fai mai e fai se isi mea ae tuu se isi mea. Vaai i le pisi o lou uso, fai le falesa, fai le atinae o lona aiga i lana pisinisi, tapena le palota, lea ua fai mai, tuu se isi mea. Tautuana lo outou soifua maloloina. O le fatu na ave ai si uso, o le fatu, le masina leni. Ae ua ou maua foi le faamatalaga i lena ituvai o le Tafatolu o le Faamasinoga, ua ave foi se tasi o uso Faamasino o le Faamasinoga o Fanua ma Suafa, o le fatu. Ua ou manatua lava le tuualalo ina ua valaaulia se tasi o alii fomai e faamanuia le uaina i se tasi o faaipoipoga, ou te le iloa po o se tala malie a le fomai, ae na mau lava i lou mafaufau. Fai mai ua fai lana tala e uiga i le uaina, ona iu lava lea ina faapea mai, e i ai foi gaoioiga e mafai foi ona tatou faia e tatou e puipuia ai le fatu o le a pe. Fai mai, tatou ia e i ai aiga e maua i le mai fatu, e tele foi le avanoa tatou te maua ai foi tatou i le mai fatu. O le puipuiga o le mea e moomia. A e faalogo atu loa ua tiga mai le fatafata ua tau mainiini mai le fatafata ua e iloa o le fatu, tuitui, tuitui. A le o lena, tale, tale malosi, tale avaavau ia gaoioi le fatu, aua ne i tuua lava se avanoa e tu ai le fatu.

FOFOGA FETALAI: Ia, ou te fautuaina le sui usufono mamalu, le tatou Tala Faatatau Faaopopo o le Tupe ia oo i ai le saunoaga.

Afioga TAEFU LEMI: Faafetai i lau Afioga i le Fofoga Fetalai. Ia o lea lava e alu atu lava i luga o le soifua maloloina le lauga. Fai mai e pei le fati o le uati, a tau pupulu vae, popo. Ia e le o au se fomai, e le iloa po o le mea lena ua faalavefau ai le Afioga i le Fofoga Fetalai ona e le o au o se fomai, a o le faiga ina ia mafai ona soifua. A sefe ai le fatu, ia laveai le soifua a maumau.

Lau Afioga i le Fofoga Fetalai, na fai lau tala i le matou nuu i le Fono, na ou fautuaina ai le matou nuu, taumafai e fai ma o e fai a outou siaki i le fomai, tai masina, tai 2 masina, siaki i le fomai, ua tatou matutua ua le tutusa foi le malosi. O au la ma lou aiga, e o lava i le falemai e aupito sili lava ona taugofie, ae aupito sili lava ona maeaea le sailiga a le fomai e fai i ai. O le a le falemai? O le falemai o fatugao. O le latou polokalame o lo o fai nei, e sili ai le puipuia nai lo le tau togafitia, ua le lava masini. Siaki le toto, siaki le suka, siaki lou mamafa, fua lou umi, faamau ou tausaga, tuu mai le atigifagu e te alu e ki mai tua, 5 i le 10 minute valaau mai le fomai e te alu atu e te lua talanoa, ona saofai lea i lalo.

O au la lea e tupuga mai i se aiga e suka ma toto maualuga, e pei lava o le faataliga o le iuga o le faamasinoga le mea lea o le a sau i le fomai. O le faaiuga o le tausaga na siaki ai. Fai mai le fomai, lelei le suka, lelei le toto maualuga, mamafa lou tino pe a fua i lou umi. Ia, masalo o se fua Saina po o se fua papalagi lea e faaoga e le vaega. A oo loa la le faasologa i le fagu lea na ota alu ma ita i tua, e vaai atu loa le fomai e mama le paipa na ki mai ai, o la e tau kilia lava ma manino i le vaai e te iloa atu le isi itu o le fagu, fai mai, faafetai, o lo o lava le vai i lou tino, tumau ai pea i le tausiga lena. Ae a tagai atu le fomai e palapala le paipa na ki mai ai ua tau le iloa atu le isi itu o le fagu ua pei o le penisini o le moavao ua uma ona sui, ona fai mai loa lea o le fomai, e de-hydrate oe, le lava le vai i lou tino, taumafa le vai, taumafa le vai.

Lau Afioga i le Fofoga Fetalai, o lea o le a uma lau faguvai a o lea faatoa amata le Fono. Le tatou Palemene, taumafa le vai, taumafa ane le vai. Faafetai i le Failautusi ma le Sui Failautusi e maua le vai. Ou te toaga lava e inu le vai, ona o le manumanu lava i si ola lava e tasi lea e maua. A uma ona inu lau faguvai ua uma, ou te faliu atu inu faguvai a le aualii ia. Tautuana alii e taumafa lua vai, e le o se itumalo inuvai le itumalo lenei. Ma aua lava ne i lua popole pe a maua se isi o oulua i le mai fatu. O le fatafata lava ou te tietie ai, a lea o lea, o lena e latalata mai le alii fomai o Salausa, e fesoasoani mai i togafitiga. Lau Afioga i le Fofoga Fetalai, ia o le community service lena a lenei itumalo. Ae o le a ou agai loa i le mea lena e te saunoa ai.

Afioga Peseta Vaifou Tevagaena (Faasaleleaga Nu 4): Lau Afioga i le Fofoga Fetalai, o se mea e fia faamalamalama lau Afioga.

FOFOGA FETALAI: Tulai mai le sui usufono mo Faasaleleaga Nu 4.

Afioga Peseta Vaifou Tevagaena: Faafetai i le saunoaga a le sui mamalu, o le vai lea e tutu nei i luma o maua ma se tasi o Minisita Lagolago, e ala ona le inuina le vai lea i ou luma, leaga o lea ou te igoa ai, o le Vaifou. Ua lava lava le vai lea ou te inu ai, ma lou faaaloalo lava, o le Vaifou. O se fesoasoani atu i le sui usufono.

FOFOGA FETALAI: Agai i le tatou galuega. Se i tulai mai pe i ai se mea o... lau Afioga i le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, faafetai mo le avanoa. E leaga o lea ua fautua mai le sui usufono e fai ma o e siaki i le falemai ia vaega ia. Ou te iloa afai e siaki i aso taitasi i le taimi lenei, a o loma le palota, e manaia atu lena. Aua e iloa ai le alu i luga ma le alu i lalo. Aua ou te iloa o... aumai ma sui la e o e tauva e sue faatasi o tatou toto, e iloa ai po o le a le.... po o ua maualuga po o ua maualalo, ia ma le suka. Ma lou faaaloalo lava.

FOFOGA FETALAI: Manaia foi le fautuaga, aua o si taimi lava lenei, aua o le isi e le mai fatu, ae te i lava ua mai fatu. Tulai mai le sui... pe le toto maualuga ae te i lava ua toto maualuga leaga o le taimi o le palota.

Afioga TAEFU LEMI: Lau Afioga i le Fofoga Fetalai, e fia faamauina lau faafetai tele lava i le Minisita po o le foi sa Minisita na muai tofia au e avea ma Minisita Lagolago, le Afioga i le Sao Faapito le Afioga ia Fiamē Naomi Mataafa. E momoli atu le agaga faafetai e tusa ai o le faatuatua na tuuina mai i lou tagata. E le gata i lenei Paeaiga i le Matagaluega o le Siosiomaga, ae o lena foi Paeaiga i le Faamasinoga. E le fou le mafutaga ma lau Afioga i le Sao Faapito, leaga o le soifua galue mai mea sa faigaluega ai, o lau Afioga lava sa avea ma Minisita, seia oo mai i galuega sa taufaaiuiu nei e i ai le ola galue i le Iunivesite o le Pasefika i Saute. Sa avea lau Afioga ma Taitaifono o le Komiti Faafae o le Iunivesite. E masalo o i lea e maua ai nai avanoa ia ua tusa aao ai lau Afioga i le Sao Faapito e avea au ma Minisita Lagolago, a o le agaga faafetai e le faaitiitia.

Lau Afioga i le Fofoga Fetalai, o le lauga e faaiu ai Fonotaga o lenei Paeaiga e 5 tausaga, ma e leai foi se isi faiga e sili atu i lou lea iloa. Ona ootoo ai lenei 5 tausaga na i lou toe foi lava i tua. I nai sini na ausia ma nai vaega foi na mafai ona faatinoina i lenei 5 tausaga.

Lau Afioga i le Fofoga Fetalai, o le amataga o le 5 tausaga lenei, na o tatou faanofoina ai le Tama o Aiga Tauaana i le Nofoa o Le Ao mamalu o le Malo, o le amataga o le Paeaiga lenei. Na faatino ai le puleto ma le pule faatamalii a le Palemene o Samoa i lalo o le Faavae o le Malo Tutoatasi o Samoa. O le faa-tolu ai lea ona faatino le fuafuaga a le Palemene. Aua na mavae atu loa Ao Soofaatasi na maluu ai le Susuga i le Malietoa i le tausaga e 2007, ona faatino ai lea e le Palemene. O lana faatinoga lea o le Faavae e saili ai Le Ao Mamalu o le Malo, ma tulai mai loa se tasi o Tama a Aiga. Na faa-lua ina ua toe tofia, faa-tolu ina ua suia loa i le Tama a Aiga o Tuimalealiifano.

E momoli ai lau faafetai, momoli ma faamauina le faafetai tele a le itumalo. E le faigofie. E fai lau tala i lou itumalo. Vaai, e tasi lava le Aiga Tauaana i Samoa, na o le itumalo lava lenei e maua ai, ae tele aa o le tagata i lo aa o le

laau. Ia faafetai, e ao ona tatou faafetai i le Palemene o Samoa, aua o i ina na to mai ai le pule na saofai ai le tatou Tama. Ae paga lea, e toagaogao lo tatou aiga i totonu o le Palemene, faafetai i le Palemene i lene faaeaea na lafo mai i lene taimi. A o se faaeaea foi na matua iloga ona matietie ai lenei itumalo, a o le Tama a Aiga sa fai ma Sui Ao mai le amataga, a o le i tuatoatasi, seia oo mai ina tatou faanofoina i le Nofoa, e 50+ tausaga mulimuli ane. Malo faafetai.

Lau Afioga i le Fofoga Fetalai, e faasolo mai lenei 5 tausaga, na faatino ai e sui e toa-sefuluvalu o le Palemene o Samoa se polokalame i le aoga faaloia a le Iunivesite o le Pasefika i Saute i Vanuatu se Tusi Pasi o Tulafono. E 2 lava auala e maua lelei ai e le tagata le galuega o nafa nei ma le Fono Aoaofaitulafono. O le sau e nofo ai i i ma matau ma sailiili ai i totonu o le faatinoga o le galuega a le Palemene, ia po o le alu foi e aoga ai. E 18 itumalo sa faatinoina lea polokalame ma o se matatia foi lea sa faatuina e le Palemene o Samoa i Palemene uma o le Pasefika. E 3 lava tusi na alu i tua, tali mai lava i le aso e tasi. E filifili e le polokalame, e faatupe e Malo Afaatasi, ona e tele lona faamalu e maua ai faamanuiaga foi a le polokalame.

Lau Afioga i le Fofoga Fetalai, na matou aofia ai i le polokalame lenei ma nisi o Minisita o le Kapeneta, o le Afioga ia Lopaoo Natanielu, Loau Keneti, Tafua Maluelue, Lauofo Fonotoe, Gatoloaifaana Amataga, Aliimalemanu Alofa, Fuimaono Teo, Nafaitoa Talaimanu, Toleafoa Vaafusuaga Ken, Mulipola Laki, Lenatai Victor, Ili Setefano Taateo, Faumuina Wayne Fong, Faalogo Iosefo, Tapulesatele Mauteni, Tuifaasisina Risati ma Pa'u Sefo Pa'u. E 2 lava vaega e te maua lelei ai le matafaioi ma le gafataulima e le Palemene o le faatinoga o lana galuega, o le pasia o Tulafono, aoga po o le saili iinei. O itumalo o faafogafoga mai, o le toa-sefuluvalu na ou tolaulauina suafa ua fai uma le lua lene, ua fai uma le lua lene. Malo le sailimalo.

E tele galuega e faatino e lo tatou Malo, e faia e Samoa, ae na matua ogaoga ona aafia ma lona tulai mai, aemaise i totonu o le Pasefika. O le tatou malaevaalele faava-o-Malo sa feagai ai ma atinae i totonu o lenei 5 tausaga. O le tatou Kamupani vaalele o le Samoa Airways. O aualatetele o le Malo e alu atu iinei e tau i Malua, Phase 1, Phase 2 e alu atu i Malua e tau i le malaevaalele, ma le Phase 3, o le alu atu i le malaevaalele e tau i Falelatai. Ia faamalo i lo tatou Malo mo fuafuaga alualu mamao. Ia talosia ia, o le Atua fai aso, se aso faataunuaina ia fuafuaga. Sa o tatou talimalo i taaloga o le Pasefika i Saute i le ogatotonu o le tausaga e 2019. E tasi lene tala ave, faafetai i lau Afioga i le Minisita, manuia le tatou taligamalo. Ma sa laveai ai foi i ina e Samoa isi atunuu o le Pasefika sa le lava le latou tapenaga, e faatino ai taaloga, malo faafetai.

Ona faapulou loa lea o tatou e le misela i le faaiuga o le tausaga lava lene. Na matuai aafia ai lava ma galulu faavae i le tausiga o le soifua maloloina o le atunuu i lene faamai. A o se fagufagu malosia foi lea i lo tatou Malo,

fagufagu i le Matagaluega o le Soifua Maloloina, na toe pupula ai i ina le tatou vaai. Ma toe faia ai isi aiaiga ina ia faamausali lo tatou tulai mai. E le i ave fua le 80+ o soifua na mauamau ai. E le i maumauina, e le i alu fua. E leai, na toe tapue ai iina le sa o Samoa, fai le Tulafono e faamalasia tui puipui, lea ua i ai nei. E le toe tea faamai ma le lalolagi, ae faafetai i le tapenaga. E oo mai le Koviti-19 i le 2020, ae ua maatiati le tulai a Samoa. O Samoa lava o le tasi o atunuu ma muamua lava i le lalolagi ma le Pasefika e fai ana aiaiga e puipui ai Samoa. Ua le toe fia oo Samoa i le misela, o le aoga lena o le misela i le Koviti-19 pe a fua i le tatou tali atu. Na faitioina ai Samoa e nai nisi atunuu tuaoi ua tatou vavevave tele, ae le i iloa ai e na atunuu. E leai e le i manao Samoa e toe maua i le misela. Ia faafetai i lo tatou Malo.

E mai lava ia Mati, o lena tausaga, e oo mai i le taimi nei, o lea lava e fai a tatou tapu, e taumafai lava i le puipuiga e gata ai. O lea ua tatou toe lalaga le tatou auaunaga a le Soifua Maloloina, tatou toe foi i tua i nuu, le primary health care. O lea ua tatou toe foi e uunai, o lea ua toe lalaga Komiti Tumama, sa fai mai i la aso. O lea o le a toe fai le falemai o lenei itumalo, faafetai i le Malo i lana faaso, o lea o le a toe fai le falemai o lenei itumalo, e toe foi e toe tapena mai. E mai lava i le amataga le cross rule, ia le soifua maloloina o le tagata, ia faafetai mo nai ia vaega. A taunuu mai le tatou tui puipui, lau Afioga i le Minisita, se i tagai ane lava i le Tulafono na faamalasia ai le tatou tui puipui ina ia mautinoa, e oo mai foi le tama lea, o tagata uma. E oo lava i fualaau o le mumu, lau Afioga i le Fofoga Fetalai, e i ai isi na inu, ae i ai isi e talanoa mulimuli i le mea na tiai ai fualaau o le mumu. E tasi lava le tagata e le inuina, oti atoa le campaign lea na fai. Leaga o la e alu lava ma le siama o le mumu i lona tino e toe foi mai lava ia tatou i se taimi. O suiga o le tau, is here to stay.

E pau le tatou mea e fai, o nai laasaga foi nei, e tau mai e latou e mitigate ma adapt a tatou mea e fai, ina ia tuutiitia le aafiaga. E i ai lava si aafiaga laititi na ou maua, ina ua fai le suiga e le Malo o Amerika i le latou palota sa fai. Na mafua la lou fiafia, ona ou te tilotilo i le vaega o le siosiomaga. O lea o le a toe foi Amerika i totonu o le feagaiga i Paris, Paris Agreement. O lona uiga o lena mea, e 2 lava mea, tele ma le faitau fia miliona mai le saofaga a Amerika, lea o le a toe foi i o, e benefit ai tatou i Samoa ma isi lava atunuu lea e pito sili ona aafia i suiga o le tau. E le gata la i lena, ae o le a sau ai Amerika i totonu o puipuiga foi nei, e fia le vevela, e fia le kaponi, o lea o le a sau i ai. Faafetai i le suiga, le faaiuga a lea Malo, sa o ta fiafia ai lava i le suiga lea ua i ai. Ua faasa e lo tatou Malo pepa iila, e moni lava la e le i maeaea lelei le vaega lea, ae o lea ua faasa. Na tatou amata ia o single used plastic, o lea o le a tatou faasolosolo atu lava ina ia matua leai lava ni plastics.

Malo mo pulega lelei o le tatou Malo, le Matagaluega o Tina ma Tamaitai Atinae o Nuu ma Afioga ma Agafesootai o lea ua oo lava i afioaga o lea ua fai mea ia o Taiala, o District Development Plans. Pulega lelei, sa amata i le tatou lotoifale, talia lelei e Malo Aufaatasi lea e i ai, Sustainable

Development Goals e 17. Ia oo mai i le tatou Strategies for the Development of Samoa, ia o lea ua oo i nuu. O lona uiga it's a holistic approach e leai se isi e toe tuua i le tatou atinae lea o le a fai, ia faafetai. E pau lava la ta tuualalo ma la ta tatalo, ua uma foi ona ou talanoa i le Afioga i le Minisita, ua fai lava le fono a lenei itumalo, se le tofu sui o le Komiti ma kopi o le taiala, e na o le 10 lava kopi na aumai. E manaomia nisi kopi, o le Komiti fou le komiti lea. Ma e manaomia ia i ai se support laititi lava, at least le amataga lau Afioga, e fai e amata mea le Matagaluega, avatu sina mea e amata ai, e amata ai Komiti nei. Ua tufa tupe i Komiti a tina ma isi komiti, o komiti uma na e sau i lalo o le Komiti lea. O lau lea tatalo i lau Afioga i le Minisita, se i tau fai ane sina, a o se \$2,000 foi se i tuu ane i le account lea tausaga faale-tupe ma lea tausaga faale-tupe, e fono ai nai toeiina ma talanoa i mea ia. O le Komiti e taitaifono ai le tofi o le itumalo, a o ona sui o pulenuu, ma sui tamaitai o le nuu. E i ai le sui o le Aufailotu, le sui o tupulaga talavou ma le sui o i latou e i ai manaoga faapitoa.

Ia faafetai i le Matagaluega o Faamasinoga, ia e tele lava le vavao...

FOFOGA FETALAI: Se i tulai mai le Minisita o Tina ma Tamaitai Atinae o Nuu ma Afioga ma Agafesootai.

Afioga Hon Tuitama Talalelei Tuitama (Minisita o Tina ma Tamaitai Atinae o Nuu & Agafesootai): Lau Afioga i le Fofoga Fetalai, se taimi ona i ai ni tapenaga mo le faamalamalamaina atili o le tulaga lea e tau o taiala o itumalo, District Development Plan. E pei o le agaga maualuga lava, o le tuuina atu lea o filifiliga, e soalaupule ai le itumalo, ma aumai e latou o latou lava manaoga. O le faa-Peretaniaina o le auga o lenei mea, o le ownership. Ina ia faia e tusa o le finagalo o le itumalo, ae le o se faatonuga a le Malo, po o le Matagaluega, i mea e tatau ona faatino i totonu o latou itumalo, e lelei ai o latou itumalo. E sao lelei le saunoaga a le sui usufono, ua uma ona talanoa mai, ma o se agaga lelei foi lea e taliagofie e le Matagaluega le matagofie foi o le naunautaiga o le Afioga i le sui usufono mo Falelatai, ina ia lava ni tusi o latou lava taiala na tapena mai e latou. E faasafua atu i le lautele o le itumalo, ina ia malamalama ai foi ē e le o maua avanoa e fono ai i fono a Komiti ia, e pei ona tolaulau atu e le Afioga i le sui usufono, mo a latou fuafuaga mo le atinaeina o le latou itumalo. O la e faafofoga mai le matou Matagaluega, ia o le a faapea foi ona galulue ina ia faamalieina le talosaga e pei ona tuuina mai e le Afioga i le sui mamalu. Ma le faaaloalo lau Afioga i le Fofoga Fetalai.

Afioga TAEFU LEMI: Faafetai i le Minisita, se maumau pe ana faapea uma tali a Minisita i taimi uma e tatalo atu ai. Ia le Matagaluega e, o lea ua to mai le pule a le Afioga i le Minisita, ia na o ni nai kopi lava. E eseesee foi itumalo, o le isi itumalo e tasi lava le nuu, o lona uiga e tasi le pulenuu tasi

le sui tamaitai. O isi itumalo e tele nuu, e matuai tumu lava le potu e fai ai le fono. Na ona faapena atu se faamatalaga, alofagia nai kopi se i faalava ai lenei Komiti. A tatou finagalo e faaoga, kopi, ae a finagalo e teu lelei, ia ona faapena lea.

O le Matagaluega o Faamasinoga na avatu i ai lau faafetai ma lau faamalo, e tusa ai foi o le tulai mai i lenei vaiata. O le tapenaga o le anofale, ai o le tapenaga lea e tapena ai aua lo tatou Tulafono na pasia nei. O lea ua fai suega e sue ai Faamasino o le Faamasinoga o Fanua ma Suafa. Ae faapena foi i totonu o le lotoifale o le faatinoga o le auaunaga a le Ofisa o le Lesitala, ia faapena ona...o nai atugaluga lava ia sa i ai i le amataga. O le toatele lava o le Palemene sa i ai i le agaga lea, e manaomia e tapena le anofale o le tatou Faamasinoga o Fanua ma Suafa, a o le i alo atu e fai le laasaga lea ua fai e le Tulafono. O lou la iloa, o lea ua amata, o lea ua amata, faaauai ai pea ia nai vaega ia, o le faia o suega. Ua tatou iloa foi, e toatele lava nai isi faamasino, ana sau i le taimi lenei, semanu e le o maua lea avanoa, ona o le... a o lea ua fai laasaga lelei a le tatou Matagaluega, ia faafetai.

O le Matagaluega o Leoleo, e momoli atu lau faafetai, faafetai lava i le lototele o le Komesina o i ai nei i le faatinoina o osofaiga ia e alu. Sa ou fiafia lava i le tala na aumai talu ai nei, ua mama le isi o afioaga ma laau faasaina. Ua mama laau faasaina mai lea afioaga, ua ou fiafia lava i lenei tala. Ia ma silafia foi e leoleo o le la latou galuega fai, monitor, ina ia mautinoa e le toe totoina laau faasaina. Ua malo faafetai i lau Afioga o le tatou masani lea e fai, ua tatou masani ai foi, e fotuai mai lava i totonu o le Matagaluega ia se isi e nofoia le nofoa o le Ofisa Sili, pe a faasolosolo atu lava faapena. Ae ua ou iloa e i ai foi le taimi e manaia foi le break o le masani lenei, ae aumai i fafo atu. E fou foi mafaufauga e aumai i totonu, o lea e maua i le Ofisa o Faamasinoga. O le susuga i le Resitala e sau mai Niu Sila, ma le Komesina o Leoleo e sau mai Amerika. Malo mo le faasoa ma le tautua ma le auaunaga. Ua ou iloa ua tele lava...

FOFOGA FETALAI: Tulai mai le sui usufono mo Vaimauga Sasae.

Afioga Sulamanaia Fetalaia Tuiliili Tuivasa (Vaimauga Sasae): Ou te le faalavelave lava i le saunoaga a le sui usufono, silafia e lenei Maota, o le Afioga o le sui mamalu o lo o saunoa, o lona tuafafine o lea e mafuta ma le sui usufono lenei. Ae pau lava se mea e fia faamalamalama, leaga o lea ua taua le Resitala o le Faamasinoga, o le tamalii o si ou itumalo. O le agaga lenei, e le sau mai fafo, o le teine Fagalii lava o le tuafafine o le sui usufono lenei le Resitara. Pe tau faasao a tatou faamaumauga ia, e leai, o le tamalii lava sa auauna lava i nei i le tatou atunuu. Ia na alu atu i fafo e faatele le tulaga i le aoaga lea ua toe valaauina e si o tatou Malo, ae o le Fagalii auliuli lava. Ma le faaaloalo lau Afioga i le Fofoga Fetalaia.

FOFOGA FETALAI: Oi se Fagalii le teine lea.

Afioga Sulamanaia Fetaiai Tauiliili Tuivasa: Ioe, o le teine lea o le aiga o Samau e tautua i le fetalaiga a Pulemagafa, ioe.

FOFOGA FETALAI: E sao le sui usufono.

Afioga TAEFU LEMI: Ia faafetai i si ou uso lava faale-tulafono mo le fesoasoani mai. O au ua ou iloa lelei suiga o le saoasaoa o le internet, mai le 5 pe a tausaga talu ai. E \$10 sa i ai i lau telefoni i le taimi lea, ae sau loa le fusuaga a se tasi o alo o Samoa. Ou fai atu loa i lau fanau, se i matamata la i le fusuaga. E alu le taamilosaga lona 2, ae uma le malosi o le \$10 sa i ai. O le taimi lenei, e \$10, 10 fusuaga e te matamata ai, tagai i ai i le internet. O se fua... o se suiga, ae sa ou lauga soo ai foi, ma lauga ai foi a outou Afioga. E ao ona faaleleia ia auaunaga, aua e lelei ai i aoga. Ia e tau lava o le puipuiga, e taoto atu ai i lau Afioga i le Minisita, ae o se itu lelei i la matou vaai.

E faafetai i le Matagaluega o Galuega ma Atinae tetele le LTA foi mo galuega fai. Ua matou matauina foi le lelei o faatinoga o auala ia ua fia nei, o se suiga mai le 5 tausaga talu ai i le faatumuina o omoomo i palapala. Ma le leaga o le faiga o aualagalua pe a faata. Ua i ai le suiga ua tatou matauina nei, ua tatou o lava e tatala auala ma tatou matauina ua siitia le faatinoga e faatino ai e Konekarate ia tatou auala.

O le auala laupapa lea e i Vaimoso, lea na mafua ai ona lolovai Apia. O le lolovai atoa o le taulaga, o le auala laupapa lea e i Vaimoso. E na ona poloka lava o le tama lena i le ogalaau, sau ma isi ogalaau fau ai i luga, faasaga mai loa le vai sau i tai. E sau lava i luga o le aualatele a le Malo, se i toe tagai lava i ai. Ou te iloa na fai i taaloga a le Pasefika 2007 e taumafai e faaleleia...

FOFOGA FETALAI: Se i tulai mai le faauilavea a Salega Sasae.

Tofa Olo fiti Afoa Vaai: O lau faauilavea muamua malie lau Afioga, e faaopopo ifo se isi 1 minute e faauma ai le saunoaga a le sui usufono aua ua pasi mamao le 2. Ae ne i te i ua oo le saunoaga a le sui usufono le Afioga i le Minisita Lagolago, i ni ona manaoga i i le Minisita o Fesootaiga ma le sui Minisita o Fesootaiga, o lea o le a ou tago e faamaumau atu, aua e leai lava ma se isi o i laua, o i ai i le Fono. Ma le faaaloalo.

FOFOGA FETALAI: Malo. Tulai mai le Minisita mo Galuega.

Susuga Hon Papaliitele Niko Lee Hang: E le fia faalavelave i le saunoaga matagofie a le sui mamalu, e na o se mea lea e fia faasao. Na taua i le saunoaga a le sui mamalu, e faapea na lolovaia le taulaga i le vai lea i

Vaimoso. E le na o Vaimoso ae aafia foi ma isi vai na e i Lelata ma i le mauga lea i Palisi. E tele la mafuaaga na lolovaia ai ia Apia. Ma le isi mea lau Afioga, a tafe mai vai a o la e sua le tai, e faigata tele ona toa le vai, ona e leai se mea e alu i ai le vai i tai i le sami. O tulaga ia leaga o lea e tau e le sui usufono, na o Vaimoso, ae leai la, e tele isi vaitafe na mafua ai ona lolovaia le taulaga. Ma lou faaaloalo lava.

FOFOGA FETALAI: E faamanatu atu i le sui usufono ua maea lou taimi. Ia faai mai le saunoaga.

Afioga TAEFU LEMI: O le auala la lea e i Vaimoso e fai si maualalo laititi o le faatinoga o le auala lea. O lea ou te iloa na tapena i le 2007 ona o taaloga a le Pasefika sa fai i lona vaitau. A o le pou lona e i lalo o le auala lona, o le matuai sese lava o le mea lona e tu ai, o le tama lava lona o lea e poloka a nei ia... E i ai le pou e tasi lea e tu lava i le ogatotonu i lalo e...se i toe tagai lava i ai lau Afioga i le Minisita i le lumanai, i le tapenaga foi o le sa o Samoa ae faaleleia ia vaega.

Ia mo le nofoaga lava o le taulaga ua fai si maualalo. E pei e manaia i lata vaai pe afai e tutusa uma le atinaeina. O le fai atu lava o lea galuega ou vaai atu ua tanu, siisii i luga le faavae o le fale. Ia maumau pe ana laugatasia uma lona faiga i atinae uma ma aiga uma e fia fai a latou atinae, mulimuliane, ua lifi atoa lava i luga le taulaga. Ma faapena foi ona siisii i luga o tatou aualatetele e faaaogaina e le Malo. Ae ua tele galuega e pei ona ou taua e fai i le 5 tausaga, ae o le mea moni le faafofogaaga a Samoa, e le laititi le tatou atunuu. E toa-limasefulu sui usufono o le Palemene, e 50 itumalo. A fai se galuega se tasi i lou itumalo, faafetai i le Atua, a fai se 2, matua vivii i le Atua. Aua e le laititi lo tatou atunuu. O le mea la lea, o lau tatalo i lo tatou itumalo, ia onosai mai, o la lava e faasolosolo atu lava. O se taimi o lea o le a faataoto lo tatou falemai ma tulaga faapena, ona faatino foi lea. Ia faafetai ai i le Minisita mo ia fuafuaga.

O le i si matatia foi lea na faatu i lenei 5 tausaga, o se suiga foi lea i Nofoa tatou te nonofo ai i totonu o le Palemene. Ua see atu nisi o tatou uso a sui usufono, sa i i lenei itu ma nofoia le la itu o le Maota. U see atu ai foi ma le Afioga i le Minisita ia Fiamme sa ma mafuta i le Matagaluega. Ua nofo mai i le la itu, sa matou nofonono lava i inei, e le faigofie. Aua e le faia e tagata e toa-lua pe toa-tolu pe toa-fa le faaiuga, e tetele o tatou itumalo ma nai aiga o lo o tapuai mai. O le mea la lea, e le faigofie. Ou te iloa lava e toatele e fesilisili mai, e oo lava i le itumalo e fesilisili mai, ia e le faigofie faapena. E ao lava ona manatu i le itumalo, e le laititi le itumalo. Ae tauaapa foi i le iu maea ma manatu i faavae o le itumalo ma le nonofo ai.

Lau Afioga i le Fofoga Fetalai, ia ai ua uma ona summarize lau 5 tausaga. E momoli lau faafetai i lau Afioga, ua sauni foi le tatou itumalo e fai le palota. E le mafai ona i ai se isi suiga, o mea lava ua uma ona faataotooto.

Ua uma ona tatou feiloai ma talanoa i Tulafono Tau Faaofi e 3, aumai la outou lagolago, e le mafai ona alo ese le sui usufono. Na sau lava le sui usufono finau loa i le mea ua outou finagalo i ai. O Le Ao o le Malo, o le tama o le Aiga Tauaana la e i le Nofoa. O le tatou falemai o le a fai, nisi o atinae e ono aumai ai le lagolago a le itumalo. O nai mea ia e liolio i ai ma manumanu i ai, tatou aeae ia sia manu ua ulu. Ia tatou aeae ia sia manu ua ulu.

Le paia e o lo tatou itumalo, e leai se isi e faaletonu o sui e...e tasi lava le tagata e tau faaletonu ma vaivai, o le sui o tulai nei i le Nofoa. Ae o le matua malolosi o le isi toa-lua e o mai, e le vaivai. Ia o le itumalo e i ai le afioga a aiga, ma le faafaleupoluga a Leulumoega. O le mea e taoto i ai le tofa i aiga ma le faautaga Leulumoega, o i ina le faatonuga mo au, e tau lava ina ou solisolimulivae i ai.

O lau tatalo i lo tatou itumalo, mau pea le toovae, mau pea le toovae a o aga atu le Palemene i lana faiga palota. Ia faasolo foi le faamoemoe o nai uso o le la itu o le Maota e pei ona ou taua, ia o ifo e lagolago pe a o atu. O ifo e lagolago e le o nisi, o Faumuina ma Laauli o Falelatai aouliuli, o tama o le Tauaana. O Olo sa ma vasega i le Kolisi, ma nofo tumau i le Kolisi, ou fai atu e sau e fai le ma Book-Keeping ae fiafia lava ia i le Biology. Ua ou iloa lava o la ua manuia a si uso i lana filifiliga sa fai i lene taimi o ma aoga, e mafana lava le mafutaga. Ou te le toe tau fai atua se tala i le Saofaapito ua loa le mafutaga. A o le tuualalo lene na fai i le itumalo, lagolago ae nai o tatou uso pe a o atu, e le o nisi. E usu le nuu, usu le itumalo, o ifo e lagolago e maua taumafa, a maua se pasese aua le taua mai. Ae le tau faia sa outou folasaga o lene ua uma ona ou faia. O la ua uma ona ou faia le tatou folasaga e le o au o se isi.

Tou te o foi e finau ina ia maua se palota a Pau ae o la foi ou te finau au ina ia maua se palota a Pau. Ia o le tatou galuega e fai faatasi aua tou te tuulafoaiina si o outou uso ona o lea e nofo atu i i. O le tatou galuega e fai faatasi ia o le faafetai lea i le paia o le tatou itumalo ia e tusa ai ma le tapenaga mo le tatou...

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, sina avanoa lava...

FOFOGA FETALAI: Ia, o lea sa e taua ia le suafa o le sui usufono mo Gagaifomauga Nu.3.

Susuga Hon Laauli Polataivao Leuatea: Faafetai, Taefu o le polokiki e uma taeao. O aiga e ta te o i le tuugamau, faafetai i lau tuualalo. Leaga o le agaga lene o le Maota lenei e tausii le filemu, ae lototele. O lea e ma te tuualalo atu foi ma manatua oe i talosaga. Folau lou sa i lene itu o le malu, o lea foi ua folau lo matou sa i lea itu o le malu.

O ai e afatia togi atu le maea, e faapena ia le tatou taaloga ae tatou taaalo i le faatamalii o la e tapuai le atunuu. Leaga o lea ua agiga nisi o le Maota lenei o faaoloataua, se vaai o ifo e tetee ma faaleaga si a matou savali ma le feiloaiga ma le atunuu. Ia ae faapena ia le tatou fetausiai, e tasi lava le Aiga Tauaana lea e tatou sulii uma ai.

Ia ae manuia foi ia lou faamoemoe. E fetaai lava tama, o le uso. Ae faafetai i lau tuualalo, e faamama ai nisi o finagalo o alualua o le tatou Maota, i le tau faitai fua i si a matou savali manino, malamalama, ma taua mo le atunuu. O le faafetai lena Taefu, manuia lou tulai mai.

FOFOGA FETALAI: Ia, faaiu mai le saunoaga ua maea lou taimi Taefu.

Afioga TAEFU LEMI: E pau lava lea o si... faafetai lava lau Afioga Laauli po o lau Afioga Anae Lupematasila ia e tusa ai mo le fesoasoani mai. E moni a au, e taaalo lava tama ae o le uso.

E tasi lava si mea lea lau Afioga i le Fofoga Fetalai, le vaofilifili o le mau faamatalaga felafoai solo i luga o upega tafailagi, e pogisa ai le vaai. O le tatalo lava i le atunuu, mau pea le toovae, mau pea le toovae. Aua ne i avaga gofie le tofa i le upu e lafo ma le tala e faalele. E le taitaia faaiaamatau le tofa ma le faautaga. Sailiili, fesilisili, suesue vaai po o ai na faia le faamatalaga? Faatoa fai sau faaiuga, afai o se agelu, e faigata ona tetee. Ae afai e leai, ia sailiili ia mautinoa.

Fai mai le mau a le tasi alii, 'you can fool some people sometimes, you cannot fool all the people all the time'. E general lava lau talanoa lea e talanoa ai, ae o luga o upega tafailagi lea e manaia lava ia tatou nusipepa ma tatou leitio ma le TV. O la e i ai Tulafono e puipui ai latou, puipui ai tatou. Ae a upega tafailagi? Ia o ai ana faamaopoopoina ia le fata lapisi a le lalolagi? O le mea la lea, mau pea le toovae.

Le paia e o le tatou itumalo...

FOFOGA FETALAI: Ia, aua le faamamafaina mea faigofie.

Afioga TAEFU LEMI: Alo i lau faiga filifiliga, alo i lau faiga filifiliga, palota a lo tatou itumalo. Ia tofa i le Atua le tatou itumalo ma le faiga filifiliga. Ia to manu manuia ai ia lo tatou Malo. Momoli le faafetai tele i le tapuaiga a le itumalo, faafetai i le tapuaiga a Samoa, faafetai i lau Afioga i le Fofoga Fetalai ma le Palemene, soifua.

Na faailoa le agaga fiafia o le Palemene i le patipati o o latou aao ina ua maea le saunoaga a le sui usufono mo Samatau ma Falelatai.

FOFOGA FETALAI: Malo, faafetai, malo le lauga. Malo foi le saunoa i le sui usufono mamalu. Faafofoga foi Falelatai ma Samatau, ia malo le fai o

le faiva. Malo le tapena ma le sauni aua le saunoaga ia aua foi le fala e fola i luma o le itumalo. Ia ae tuli i luma se ai aua le faamoemoe o le atunuu i lana faiga filifiliga. Ia tofi mai i le lagi se sui e tauave e tuai mai e tauave le fofoga o le itumalo.

O le matou tala lea, ia tulai mai se isi sui usufono e saunoa, ia e leaga le tauanau o faafofoga mai ia le itumalo. Ia o lea la o le a ou laua atua suafa o sui usufono e le i saunoa. Ioe, ona faafofoga mai loa lea o le itumalo o lea e tauanau le sui usufono, ioe. Ia, o le isi sui usufono o la e fua i lo latou taimi aua e pei e lavevea i le Komiti o lea e mafua ai ia le felaugaina i le Tala o le Tupe. Ia o la e fuafua foi le latou taimi i le tulaga e pei ona ia i ae tulai maia se sui usufono e saunoa.

Toe 16 sui usufono ia e le i saunoa, o le Afioga ia Afoa Faleulu, ioe sui usufono o Palauli i Sisifo. Ia o le Taitaifono leaga o le Taitaifono o le Komiti o Tupe e faamuliga i ai le... ia ona o le isi sui usufono o lo o faanoi mai, o le sui usufono lea o Gagafomauga Nu.2. le afioga ia Faaulusau o lo o tuatuagia i le tulaga faaleaiga ma le itumalo. Ia solo mai lava lea i i i isi sui usufono ia Aleipata ia tulai mai se isi sui usufono e faapena.

O lo o i ai foi le isi sui usufono o lo o faapena e le o maua le malosi e faanoi mai. Ia o le Afioga i le Minisita o Fesootaiga Televavave o lo o faatasi atu... e ao ona avatu pea i luma, leaga o lea sa taua ma fesiligia, o faatasi atu i nisi o fonotaga faale-taupulega o atunuu i fafo o lo o faapena ona feagai ai.

Ia... e pei o le ala lena a maua le avanoa o le sui usufono, ua ou le tau tuu atua aua o le tele o sui usufono ua ova atu lava ma le afa itula tai toetiiti lava atoa le itula. Ia ae ona o le manatu foi lea ia ana o faaaoga lenei taimi, ia ua faapena foi ona maua ai isi avanoa e faafofoga mai ai le itumalo.

Afioga Salausa John Ah Ching (Faleata Sasae): Lau Afioga i le Fofoga Fetalai... pe maua sina avanoa.

FOFOGA FETALAI: Ia se i tulai mai le sui usufono mo Faleata Sisifo.

Afioga Salausa John Ah Ching: Ou te tulai atu a o tau talitali pea nisi o sui usufono e saunoa...

FOFOGA FETALAI: Salausa, Faleata Sasae, Salausa tulai mai, se mea o finagalo ai le sui usufono.

Afioga Salausa John Ah Ching: Ioe, o le tau faaaogaina o le taimi ona o lea sa taua ia le auala laupapa po o le vai lea e i Vaimoso e le sui usufono sa saunoa nei. Ia sa le manao foi e faalavelave ae e sao le saunoaga a le sui usufono ona na ou taua foi ia lologa i le itu i Sisifo o le taulaga e sau mai i i le vai lea.

O lea foi ua talanoaina ua aumai foi se tuualalo a le failautusi a lo matou itumalo, i se galuega e faatino e le itumalo e fesoasoani ai i le galuega a le tatou Matagaluega a le Malo. O le tuualalo na aumai, e faapea e matou te o le itumalo e vaai ogalaau ia vae atu le paia o le taeao, o lo o tafatafa o alavai, ina ia matou ili foi lea ma tatipi faalaitiiti ia ona lau ese laia, ia aua ne i toe aafia i totonu o le alavai ma poloka ai le vai.

Ia o le tuualalo lena na aumai e le failautusi, o le aso a taeao le fonu a le itumalo le komiti o le atinae, o lea o le a faaalua ai le tulaga lea. Ae e pau le mea lea e tau tapenapena i ai le itumalo o le tau sueina o ni meafaigaluega e fai ai. Ia afai foi e faafofoga mai nisi o faalapotopotoga, ia po o ni kamupani ia po o Matagaluega foi a lo tatou Malo, e mafai ona maua mai ai se fesoasoani, ia ona matou o lea e faatino le tulaga lea, e fesoasoani ai i le tatou Malo ma le Matagaluega e tau faaitiitia ai ia tulaga ia e aafia ai lologa i totonu o alavai aemaise alavai ia e pei lava ona silafia ma ou tau... o le mea foi lea e ala ai ona tau umi foi le lauga a lenei itumalo, ona o le tele, ona o le tele.

O le mea foi la lena a tele le itumalo e tatau ona tele le lauga, tele le taimi, ia ae o le mea lena, ia o le faaalua lena ma le faaaloalo, ia o le fesoasoani a le itumalo o lo o taumafai mo alavai. Faafetai mo le avanoa.

FOFOGA FETALAI: Se ana iloa lava o faaumi lau saunoaga. Ioe, o sui usufono ia, leaga o ananafi sa tatala ai lo matou auala, auala i Fasitoo-uta. Avea foi lenei avanoa e momoli atu ai le faamalo ma le agaga faafetai i le Palemia ma le Malo ona e silafia foi e le paia o le Palemene e leai se leo o le matou itumalo. Ia ae talu ai ona o galuega i le faasologa o atinae a le Malo, ia faafetai atu ua faitau ane ai le faitau a le Malo i si o matou nuu o Fasitoo-uta. Ia ona o le tasi lea nuu o lo o faapena ona tautua matavela i le Malo e ala i so o se atinae e finagalo i ai le Malo e tautua lava Fasitoo-uta i le Faigamalo.

O le mea la lea e momoli atu ai le agaga faafetai ma le agaga faamalo ae sa i ai le toaina o le matou nuu sa fesili mai, 'Se ua pei e fefefe alii sui usufono e saunoa o lea e tauanau, ai ona o le palota'. Ae ou fai atu e leai, o uiga lava na o sui usufono, o le isi sui usufono matua e faatalitali se i lauga ia le sui usufono laitiiti. E pei e faapena ia le finagalo o sui usufono, ia ae o le faitau lena...

Tofa Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Tasi lena faitauga a le atunuu, po o le mea ua o tatou maalilili i le palota ua mafua ai ona tauanaugata. Se i tulai mai Olo.

Tofa Olo Fiti Afoa Vaai: Ia faafetai, ua maua foi lenei avanoa ou te... faafogafoga mai si ou itumalo Salega 2, ia ou te faamalulu atu ua ou le auai

atu i le tatou fonotaga taeao ona o lea lava e tauanau sui usufono ua umi ai le Fonotaga, ia ae po o le a se finagalo o lo tatou nuu, ia ae tuu atu i tua se i maea lelei Fonotaga ona tatou feiloai lea ma le agaga faaaloalo.

FOFOGA FETALAI: Ia, e le avea foi le Palemene ma mea e logo ai au mataupu i le itumalo, ia malo Olo. Ia o uiga lava na o le faaaogaina o le taimi. Ia leaga o la e faafofoga mai le itumalo, ae o lenei foi taimi ia o le a le mea e finagalo ai le sui usufono, ia ave i tua i le faafofoga mai a le itumalo, afai e te le auai i le fono a le itumalo i le Aso Toonai taeao, ia fofoga loa i ai i lenei taimi e faaoga ai le avanoa.

Ia ae ona o lea ua tatou taunuu... tulalata i le tatou malologa masani, ia atonu o le a tatou foi mai ua i ai se sui usufono e finagalo malie e saunoa.

O le a faataatiaese galuega a le Fono Aoa mo lana malologa masani.

Na faataatiaese galuega a le Fono Aoa Faitulafono mo lana malologa masani i le itula e 10:25 i le taeao ma toe faaauau i le itula e 11:10 i le taeao.

Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Taulumaga ma galuega a le Fono Aoa Faitulafono. Ia, ua maua le malosi faaopoopo e faaauau ai le galuega ma le tatou Fonotaga.

Ia, i le ava ma le faaaloalo, ou te tapa se isi sui usufono e tulai mai e faaauau le saunoaga. Ia ou te vaai atu ia Namulauulu Papalii, Namulauulu Papalii oomi mai le... se i tulai mai.

Tofa Namulauulu Sami Leota (Faasaleleaga Nu.2): Ia faafetai i lau Afioga i le Fofoga Fetalai, manatu o lea ua palegaauau le taligasua a lau Afioga ma le Maota i lenei taeao. Ia ou te faamalulu atu i lau Afioga, o le aoga lea o le fautuaga mai i le sui usufono o Falelatai i lenei taeao. O lea na ou tau aapa atu i lau faguvai e faatino le fautuaga, ae mumu atu ai lau moli o le ala lea. Ae a e finagalo lau Afioga e toe faaluaina le lauga a Safotulafai ona o le tou fia faalogologo i ai, ia e mafai foi ona toe momoli atu. E e tele nai mataupu lea e fia faaleo atu i Afioga i Minisita i lenei taeao, leaga o au lea sa muamua ae taatia atu i lau Afioga.

Faafetai tele lau Afioga Taefu mo le fautuaga i lenei taeao. E toe talosaga atu e toe tufa mai nisi faguvai e aoga tele ia lau fautuaga ma le faaaloalo.

FOFOGA FETALAI: Ia malo faafetai, leai o tulaga lava e mafai ona fai. Ia ae ona o le tatou galuega o lea, afai o le a alu lau faalua i au saunoaga, ae o lea e le i tofu saunoa uma ia sui usufono mamalu, e pei o itu ia ou te popole ai ma faamaumauga o tatou Fonotaga, ae ui i lea leai, e pei e faapena, tasi foi lea pei e tasi foi lea galuega a le whippy o le faasolo o tatou lauga po o i i le tatou whippy? Oi o lea ua tulai mai ia lau Susuga Lufilufi.

Afioga Alaiasa Muagututia Moefaauouo Malagaitutogiai Sepulona: Ia lau Afioga i le Fofoga Fetalai, e faafetai mo le avanoa. E le gata o au o le whippy o le Maota, ia ae na ma talanoa ma le toeaina a toesea, o au e tofia ia latou e sosoo.

Ia ae e i ai lava si lafoga i le taeao e faapea e toatele ia sui usufono o le HRPP e le o auai mai. Ia sa ou nofo foi ma matau i le taimi o le lafoga lea, ia o lea la ua e taua i le taimi ua sola, sa i ai nisi na faanoi atu i lau Afioga. Ia o le mea sili foi o lea e matamata mai i le TV, o lea lava sa atoa usu ia le HRPP. Leaga o le tiute foi lea e vaavaai lava Fofoga o alii ia auai uma mai sui usufono mamalu, ia aua le faaauauina o le tatou galuega.

Ia ae finagalo ou te tofia atua ia se tootoo, leaga e i ai le mafuaaga e ala ai ona tuu i tua se faamoemoe o Lufilufi, leaga o lea e tu le Malo i Atua, o le ala lea e tataua ona fai mulimuli se tala a Lufilufi, ae o lea o le a tofi atu la e Lufilufi le tootoo, tulai mai a le o le tama matua ia Aeau, tulai mai Afoa e faaauau lana lauga ma le agaga faaaloalo.

FOFOGA FETALAI: Ia e pei e manaia foi le finagalo o Lufilufi aua e pei o uiga lava ia o Tumua pe a tatou see i le atunuu i le aganuu. Ia o le galuega lea a Tumua ma Puleono e faapena ona faaaloalo i Aiga ma Tapaau amuli aumai so latou finagalo. Ia...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai...

FOFOGA FETALAI: Ia...

Afioga Sulamanaia Fetaiai Tauilili Tuivasa: O sina mea e fia faasao ona o lea ua pau le Susuga a Lufilufi. E a foi e Susuga Lufilufi Susuga Tuisamau. E moni la e tu le Malo i le Taitai lea e i ai nei o le Atua, a o eleele nei tau Tuisamau e pule ai Tuisamau. E pei ona ou faanoi leaga e... a e finagalo e toe fai le ta lauga leaga sa e tuatuagia i le aso lea, ia leaga e te le i faalogo i le ta lauga Saleupolu. Ae o le taeao leni, ia e pei o le ala foi lena o lea ua pau le Susuga ia Lufilufi, e moni o Atua le tama lea e taitaiina le Malo, ao eleele lava nei e pule ai taua Saleupolu ma Tuisamau e taele ai... sina mea e faasao foi leaga o lea e faafofoga sa naunau lava ai Tuisamau e

tomuli i ai lenei Palemene, ia le ala la lea, nofoa'i ai lava ae o lea e faatali le Tala o le Tupe o lea e fia fai galuega a le Malo.

O le ala la lea i lau Afioga, ae pau lava sina mea o lea ua maua le avanoa e faatalitali ai le... e pei o Tuisamau ma lenei Vaimauga e pei e faapena e pule lava i ona ia eleele. Ae faanoi atu i lau Afioga i le Fofoga o le Fono, leaga o lea faatoa maua atu i le text lea ua sau, ua sau le text a lou itumalo i le lauga lea a le uso o Falelatai. O lea sa taua e le uso ia mo mea o suafa e 18 ia na o sue le faaloia, lea la ua faalogo mai ia lou itumalo e le o alu atu ai ia lou igoa. O lea la ua fai mai, o fea sa e i ai a lea ua lau mai ia sui usufono ia ua pasi ia le faaloia?

Ia ona o lea la ua ou tali atu i ai, ina ua omai i totonu o le Palemene leaga ua inaina lou itumalo. Fai mai po o le a le mea ua ou leai ai i le lisi lea aua so o se mea lava e muamua lava au, muamua Vaimauga, Vaimauga 1 lea o le a i ai nei po o Vaimauga i Sasae. Ae ua ou tali atu, ua ala la ona leai le tatou itumalo i totonu o le mea lea, ina ua omai lenei Paeaiga lea sa saunoa ai le sui usufono, tofofi ai nisi e o e faaauau ia mea ia o le Certificate. E le o se mea maualuga o le Tusi Pasi maualalo lava lena. Ae e leaga o le tatou sui usufono, e sau ma faailoga maualuluga, e le mafai la ona toe o i lalo. O lea la na ou fai atu ai i si ou itumalo, e tausaga atoa o o e fai le mea lea, o o e fai le aoaoga lea.

Ae ua ua uma le taimi o le aoaoga o lea ua omai e faatino ia... e faatino galuega e tautua i le Malo e omai e tautua i totonu o le Palemene. A o la e fai ia le aoga lea i le tausaga atoa, e faafefea le itumalo lea e faatali ma... E pei o le agaga lena na le auai ai ia le sui usufono lea o le Vaimauga i totonu ua uma ia le taimi o aoaoga, ma le taimi lenei, o le Tusi Pasi lea lea na sue ai ma le Minisita lea o Loau, e le aoga i ni faaloia foi na. O le mea e tuu e leo ai le tagata ia.

Lau Afioga i le Fofoga Fetalai, ma lou faaaloalo lava.

FOFOGA FETALAI: Ia malo, ou te ofo au.

Afioga Hon Loau Sola Keneti Sio: Lau Afioga i le Fofoga Fetalai, maua se avanoa...

FOFOGA FETALAI: Ia, leaga o lea ua lagalaga le Maota se i tulai mai lau Afioga i le Minisita o Aoga.

Afioga Hon Loau Sola Keneti Sio: E sao le sui usufono, leaga o lea sa matou aooga uma lava i le Aoga Faaloia lea. Ae o le mea moni lava, ua ala la ona le sau lona suafa, e le i pasi le suega. E le mafai la ona tuu i totonu leaga e le i pasi lava suega. O lea la ua toe ave i ai le avanoa e sue faalua ai ma le agaga faaaloalo.

FOFOGA FETALAI: Ia, taoto ia ia mea ou te molimau atu, e pei e sao lou uso lea mai i le Vaimauga. Ia, o lea ua tulai mai le sui usufono o Palauli i Sisifo e saunoa.

Afioga Afoa Amituanai Faleulu Maui: Lau Afioga ou te tulai atu lau Afioga i le Fofoga Fetalai o se mea e fia faamalamalama. Leaga o lea sa laga lou igoa e Lufilufi, o le mea e fia faamalamalama, e leai se feau a Lufilufi i le taimi e lauga ai Afoa i Palauli. Ua uma ona ou faailoa i uso a sui usufono, o Afoa ma Palauli, faatoa lauga i le vaiaso lea.

O le faasilasilaga lea ae o le tulaga foi lea o lo o taua foi ia le toe ulutaia o le tatou Palemene e Lufilufi, e leai foi sana feau po o maua ma Aeau e lauga i le taimi lenei. E pei o le faasilasilaga lea i lau Afioga i le Fofoga Fetalai. Ae o le a ou sauni e lauga mo le vaiaso lea.

FOFOGA FETALAI: Malo, faafetai, ia ua lelei. E pei e matau atu o se faaaloaloga pei o lea sa pau le Susuga a Lufilufi e pei e faaaloalo i le tama matua, le tatou tama matua ia Aeau. Ia ae ua taua ai foi ma lou suafa, amuia foi oe o lea e te lavea ai i le faaaloaloga lea. Ia e pei o le tulaga lena, ae afai e le o lava le malosi o le tama e saunoa ai, ia e leai se afaina e pule lava ia le tama matua o le a le taimi e saunoa ai, o le tatou faaaloaloga lena i le tatou tama ia Aeau. O se tasi ua aupito leva lona soifua i le Palemene, ia o tautua ma auauna e ala i upufai o le Malo.

Amuia foi ia le itumalo o faafofoga mai, ia tiga le louloua ma le leaga o le tau i lea taeao ma lea taeao, e le mafai lava ona faaletonu le afio mai o le tatou tama matua nei e faamaopoopo i le tatou galuega. Ia malo faafetai, o le tala a le Nofoa, ia faafualeva e le Atua ia lou soifua.

Ia matau atu ua... ia faafetai, atonu o lea ua maua le malosi, e fai ai ia se saunoaga a le toeaina, ia aua o matou uma lea o lea o le a malolo foi lea i le faalupega foi lea a faifeau, e malolo manumalo. Ia e i ai le tama matua ia Aeau ia e faapea foi ia le tama matua ia Faasoo. Ia afio mai ma tala mai aao, ia tulai mai Aeau e te saunoa pe afai e tusa ai o lou finagalo.

Afioga Hon AEAU PENIAMINA LEAVAISEETA (Falealupo): Faafetai lau Afioga i le Fofoga Fetalai, pau o le Fonousu a le atunuu, e ia te au le ava tele e tatau ai ma le faaaloalo, ou te tulai ai i le pau o lenei taeao. O le agaga faafetai i lo tatou Matai i le Lagi, ona o lona alofa lea ua o tatou ofaga potopoto ai Samoa, ma lana Palemene i le manuia. O Lona lea Viiga e tumau pea.

Faafetai tele i lau Afioga i le Fofoga Fetalai, mo le avanoa ua tuuina mai ia te au nei, aemaise foi le faafofogaaga a lou itumalo ua malie pule. O le a taumafai ai se leo lau Afioga leaga e faigata. E ia te au le ava tele e tatau ai, e faatalofa atu ai i le pau o le Maota Fono nei.

Lau Afioga i le Fofoga Fetalai, lau Afioga i le Palemia ma lau Kapeneta, ma le mamalu o sui usufono, aemaise le faafofogaaga mai i le Ao o Le Malo, lau Afioga Tuimalealiifano ma lau masiofo, ae tainane le faafofoga mai a Samoa i ona tulaga faalupeina. Faafetai ua maea ona faaee le vaatele i lona tulaga fita. Ae o le vaatiu ma le ofaga o Malo, le tofa tatala ma le faautaga tausua vaatele, ua seuga le lupe a vaosa, ae ua mapu ia le tulatoa, ona o le alofa lautele o le Atua ua tatou fesilafai ai i magafetauola e pei o le upu i le tamaitai o Leutogi Tupaitea.

Ua auau lalafo se leo i lenei taeao matagofie, se i momoli le agaga faagaetia ma le faafetai ia Samoa lou atunuu pele, i lau tapuaiga ao alofaiva lau Palemene i ona faiva malo i lenei Paeaiga o le a faaiuiuina. Ao le i oo se tala i le paia o le Faigamalo, e fia asiiasi muamua se leo i si ou itumalo pele i lou loto, Afio o lau Afioga Auva, o oe o le Tupu Faanofonofu ma ou Aiga. Aiga Sa Seumanutafa ma la outou tama o Gisa ma le Matua ia Seve. O le Aiga Sa Amituanai Aeau, Ugapo ma Faletagoai aemaise le Afifio o Maopu o le Nafanua Solia ma Foaimea, Peseta ma Tuimaoe. Faafea le Afio o le Matua ia Lamositele, ao le mamalu i la outou Toafa ma le Fetalaiga Asalialae, mamalu o le tapuaiga. E le faagaloina le sao o tina ma tamaitai, la outou tuualalo ma la outou tautua tusaafia, faafetai, faafetai tele.

Faafetai i la outou pule ma le faaaloalo na outou tofia ai au, o se auuuna e molimoliina se tatou sao i upufai o le Malo i tausaga e tele ua 26 tausaga nei. E le faagaloina foi i le agaga le tapuaiga a Faafeagaiga tau i le lagi, o latou faiva taulima le amia o manuia mai i le Atua i si o tatou itumalo faapea Samoa atoa, aemaise o lau faifeau o lau Ekalesia EFKS i Vaotupua, lau Susuga ia Namaia Kofe Tuiletufuga ma le Faletua. Malo faafetai le tapuai, aua o la outou tapuaiga sa maua ai lou malosi.

O le a sa outou faafogafoga mai ma sa outou silasila i ni lape o la outou auuuna i le molimoliina o le tofa ma le moe aua upufai o le Maota Fono, ia alofa, faamagalo, lafo i nuu le aina. Ae o la outou faaaloalo ma la outou faaeaea ia te au e le mafai e le mafai ona faagaloina. Ou te le pale ai, ne i suia e le la, ou te le ula ai foi, ina ne i ou saasaa ona motusia lea. Ae ou te laei ai e pei ona tala measina a Samoa, o le lagi malofie. Ou te alu ifo ma au, i le elele.

Ia faamanuia le Atua mai i le amataga o galuega i lenei Tausaga Fou, ne i ou laa loa ou te faafetai tele i lau Faafeagaiga Taulagi i le Ekalesia i Vini Fou lau Susuga Tasele ma le Faletua. Faafetai mo talosaga, faafetai mo le tapuaiga, i lou nuu pele o Falealupo.

Lau Afioga i le Fofoga Fetalai, aemaise lau Afioga i le Palemia, ma sui usufono mamalu o le Maota Fono o Samoa, se ua malo le faatoatoa, malo le onosai. Faafetai i lau Afioga i le Palemia mo atinae lelei ua faasafua i totonu o le atunuu ua oo atu lava i si o matou itumalo. Lau Afioga i le Palemia, ua se togile seu na lagatila ae faapulou i le tualima, faamalo le fai o le faiva.

Faafetai i lau Afioga i le Fofoga Fetalai mo le taitaiga o le Fonousu a Samoa. O taua lea o le a malolo manumalo, ia viia le Atua.

Faafetai i lau Afioga i le Faamasino Sili ma Ofisa Sili o Pulega o Matagaluega uma ma Faalapotopotoga Tumaoti a le Malo ona o la outou fitaituga, aao masui i le galuega o atinae eseese e manuia ai Samoa.

Faafetai ia Pule ma Tumua, Ituau ma Alataua, Fofogailefua ma Aiga i le Tai ma le Vaa o Nafanua. O le a sa outou faafogafoga i se faaletonu o le sui usufono o Falealupo i totonu o upufai o Malo, ia alofa ma faamagalo.

O le mavaega i Tulafasa i le faga i Falealupo a Toiva ma lona tuafafine o Sinatapuitema, “O le a ou alu. A e vaaia au o ou tu mai i Sasae i le taeao, ia o au lena, e te alaseu ai, ae a ou tu mai i Sisifo i le afiafi, o au lena e te talisua ai. E manatua outou uma e le galo. Ia auomanu la outou faatamasoaliiga.

Le mamalu o le Palemene, ia faamanuia le Atua i le taape o le Palemene mo sailiga tofi o le Paeaiga fou a o le a seu tapuai le tamaloa mai Falealupo. Soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Falealupo.

FOFOGA FETALAI: Ua logo le nai atea ua logo foi le nai ama, ua faafofoga foi le paia maualuga i le itumalo, ae tainane foi le faafofoga tapuai mai a Samoa e amata mai Lana Afioga Mamalu O Le Ao o le Malo, Sui o le Fono a Sui Tofia e oo lava i ona tagata lautele. O lea foi ua matau faalogologo le paia o le Palemene i le saunoaga matagofie a lau Afioga i le Tama, ioe, lau Afioga i le Tama Aeau. Ua sausaufialele ai le manu nai Utufiu a ua patipati taoto foi le Feepo. Fai mai e a? Fai mai ina ua ta tagata Leatiogie i le Amotai ma le Amouta, a o le toe aso nei nai Moamoa. O le mea la lea ua e malele ma e saunoa, malo faafetai. Ua e faafetaia le itumalo ma palelaei foi lou finagalo, aemaise foi o le paia o le Palemene i le tatou mafutaga faa-sui usufono, malo faafetai. Amuia foi o matou taimi ua mafai ona mafuta ma oe le Tama, aua sa e muaimalae i le nofoa o le Fofoga Fetalai. Ia sa matou faimeaa faalogologo, lea ua matou solisoli muliaao i ou tulaga aao, ia o le faleaoga na e aumaia ia i matou, o lea ua matou savavali ma galulue ai. Ia, e manatua pea taeao i Atua, tulou, i galuega lelei na e faia e aotauina ai, e le gata i lou foi sui usufono, ae faapea foi sui usufono uma o le Palemene.

O le mea la lea e momoli atu le agaga faafetai. Ia, malolo ia ma le manu, faamoemoe i le Atua. O a nisi o tiute ma faiva o totoe i le soifua, ia faafualoa e le Atua ma ia tautoaluaina pea lau Afioga i le Tama aua nisi o tiute pe afai e muta le tatou Paeaiga e pei ona i ai le toe Fono lenei o lenei foi Paeaiga.

Ia, o le matou tala lea, faafetai mo le faamanuiaga i le Palemene. Ia, talu ai ona e lelei ona faapea, faaiu ia i le saunoaga a le tatou Tama matua lenei aso, ioe, ma tatou faaloalo i ai i le saunoaga a le tatou Tama, ma ua lava ai foi le tatou galuega i lenei aso.

Ona manatu lea, Samoa e ma lau faafofoga mai, ia o galuega na ma le Fonotaga a lau Palemene, o lea ua matou toai i siu. O le tatalo, ia manuia lau tapuaiga. O le a foi se faafofoga ua paopapa pe ua taugalemalie i lau faafofoga Samoa, ia, e tofa i le Atua. E matua lava i lau tapuaiga Samoa le galuega a au sui usufono.

Ia, e pei o le matou tala lea. Ae tatou te le i tolopo seia aulia le Aso Gafua o le vaiaso a sau, o le a ou faaiuina le tatou Fonotaga i se tatalo.

Na tolopo Taulumaga a le Fono Aoao Faitulafono i le itula e 11:34 i le taeao seia aulia le Aso Gafua, 1 Fepuari 2021 i le itula e 9:00 i le taeao.